

**Ucapan YBhg. Prof Dr. Ahmad Yusoff bin Hassan, Naib Canselor,  
Universiti Teknikal Malaysia Melaka di Majlis Perasmian Penutupan  
Kursus Pengukuhan Pemimpin Orientasi 2009, 26 Jun 2009 di Dewan  
Utama Majlis Sukan Negara Saujana Asahan, Melaka jam 11.30  
pagi**

---

Bismillahirrahmanirrahim,

- Yang Berbahagia Prof. Dr. Zolkepli bin Buang, Dekan Hal Ehwal Pelajar dan Alumni, Universiti Teknikal Malaysia Melaka
- En. Zainal bin Bidin, Ketua Timbalan Pendaftar, Bahagian Hal Ehwal Pelajar dan Alumni, Universiti Teknikal Malaysia Melaka.
- Barisan Fasilitator-Fasilitator Program, Urusetia Program, Pemimpin-pemimpin Orientasi Siswa Universiti Teknikal Malaysia Melaka sekalian.

**Assalamualaikum dan Salam Sejahtera.**

Terlebih dahulu saya bersyukur pada Allah SWT kerana dengan limpah kurnia-NYA kita dapat berhimpun pada pagi yang berbahagia ini, di Majlis Perasmian Penutupan Kursus Pengukuhan Pemimpin Orientasi 2009.

Seperti yang kita semua ketahui, pada 28 Jun 2008 ini kita akan menerima adik-adik baru yang akan menjadi keluarga kita. Sebagai abang-abang dan kakak-kakak, saya harap adik-adik kita nanti akan disambut dan diterima sebagai ahli keluarga dengan baik. Selaku fasilitator, atau dalam bahasa mudahnya, pemudahcara, tuan adalah barisan terpenting selaku **"community builders"**, **"cheerleaders"**, **"time keepers"**, **"tour guides"**, **"founts of information"** dan **"mentor"**.

Adalah amat penting bagi pelajar-pelajar baru menyesuaikan diri dengan kehidupan kampus. Baik kehidupan di kolej kediaman

dan prasarana-prasarana di dalam kampus. Ini adalah kerana, persiapan ini penting bagi pelajar baru sebelum memulakan pengajian. Kerana itu kita menganjurkan Minggu Haluan Siswa bagi semua pelajar baru yang mendaftar pada hari Ahad ini.

Selain daripada pusat menimba ilmu, universiti juga bertindak menjadi pusat pembangunan modal insan. Modal insan yang dibangunkan bukan sahaja dari segi intelektual tetapi juga keperibadian. Selain dari meningkatkan keupayaan pengetahuan, kreativiti dan inovasi dalam diri pelajar juga dipupuk ke arah minda kelas pertama.

Pembangunan minda kelas pertama memerlukan persekitaran mesra ilmu, keintelektualan dan berasaskan pencapaian. Minda kelas pertama tidak terbentuk dalam persekitaran sinonim dengan budaya hedonisme, ampu isme dan rasuah. Minda kelas pertama tidak bercambah jika ukuran ilmu hanya diasaskan kepada jenis sijil dan tahap kelayakan akademik. Ilmu yang diperoleh hendaklah disokong dengan sumbangan konkrit dan gaya hidup berasaskan kepentingan nilai ilmu.

Kerana itu adalah penting untuk pelajar melibatkan diri dalam aktiviti-aktiviti sokongan yang dikelolakan oleh universiti terutama Bahagian Hal Ehwal Pelajar dan Alumni yang memfokuskan kepada pembinaan sahsiah dan jati diri pelajar.

Selaku pemimpin sepanjang Minggu Haluan Siswa berlangsung, para fasilitator adalah diingatkan juga agar sentiasa bersikap profesional dalam menjalankan tanggungjawab dan amanat yang diletakkan dibahu. Perancangan yang teliti, bekerja dalam satu pasukan dan membuat keputusan yang betul adalah tunjang kejayaan program Minggu Haluan Siswa kelak.

Ingin juga saya tekankan di sini bahawa semangat kerja berpasukan itu juga sangat penting antara satu sama lain. Di sinilah fasilitator semua akan dinilai dalam menjalankan kerjasama sesama fasilitator sendiri. Kekuatan kerja berpasukan ini akan menjadi sumber kekuatan bagi mengharungi pelbagai cabaran dan dugaan dalam melaksanakan tugas dan tanggungjawab sebagai pemimpin orientasi siswa. Sikap

pentingkan diri sendiri perlulah dibuang jauh dalam memastikan tugas kita berjalan dengan efektif dan efisien.

Gunakanlah peluang dan masa yang terbaik untuk para fasilitator belajar dan menjadi pemimpin kerana peluang hanya datang sekali dan hargailah jasa para pembayar cukai (tax payer) yang membiayai kos program ini. Diharapkan para fasilitator sekalian akan berjaya dalam menuntut ilmu pengetahuan dan cemerlang dalam sahsiah peribadi selepas daripada program ini.

Hadirin sekalian,

Perjalanan aktiviti para fasilitator tidak hanya terhenti setelah selesai program Minggu Haluan Siswa. Bentuklah kumpulan bagi meneruskan aktiviti sukarelawan ini. Para fasilitator juga boleh mencari peluang untuk memperbanyakkan aktiviti yang melibatkan pelajar-pelajar dalam menunaikan tanggungjawab sosial serta menyertai aktiviti khidmat masyarakat. Sumbangan anda diperlukan dalam membantu masyarakat yang kurang bernasib baik di luar sana. Saya berharap agar anda dihiasi dengan nilai-nilai murni seperti ini.

Oleh itu, buatlah yang terbaik untuk diri anda, keluarga, warga kampus, masyarakat, bangsa dan Negara.

Akhir kata, saya ingin mengucapkan selamat maju jaya buat para fasilitator semua dalam mengharungi cabaran sebagai barisan Pemimpin Orientasi Siswa Sesi 2008/2009. Dengan lafaz bismillahirrahmanirrahim, saya menutup Kursus Pengukuhan Pemimpin Oreintasi 2009.

Sekian. Terima kasih.

Wabillahi taufik, Wal hidayah, Wassalamualaikum Warahmatullahi Wabarakatuh.